

Dangz Siujdingz ndaej samcib bi lo, daengz gizneix hwnjban ndaej sam bi lai, hix caengz damzyoux. De raen Lij D Ngh baenzmbauq youh gaenx-guh, ngamjhoz dangqmaz, caeux couh siengj caeuq de guhyoux lo. Aenvih swheij beix Lij D Ngh sam bi, lau de yiemz…… Dangz Siujdingz maj baenz hung hix noix raen bouxyah beix bouxgvan.

Gaxgonq, miz haujlai baez de caeuq Lij D Ngh caez youq giz ndeu seiz, de ngamq siengj haibak gangj gij sim' eiq bonjfaenh lo, Lij D Ngh couh riu naeuz: "Cejdngz miz maz saeh couh gangj vei." De baez dingq daengz "cej" cih neix, gij vah ndaw hoz cungj ndwnj roengz dungx bae lo.

"Cejdngz miz maz saeh ha?" Lij D Ngh riu cam.

"Danghnaeuz dahsau beix gvaq daegmbauq sam bi, mwngz baenzlawz siengj ni?"

"Vahsug naeuz 'mehmbwk beix bouxsai, caiz doxmoek doxaemq', beix sam bi, miz maz youqgaenj? Cijaeu song boux sim doxgyaez!"

"Gangj ndaej ndei! Daengzcog gou couh ciuq biucinj neix ra gvan!" Dangz Siujdingz riugekgek naeuz, sim diemz gvaq dangzrwi.

Seizneix Dangz Siujdingz yawj Lij D Ngh engq swnhda lo. Lij D Ngh doiq Fangh Yizboh yied ndei, sim de yied in, hoeng……

Lij D Ngh bouxmbauq neix gangj noix guh lai, moix baez cungj hawj Fangh Yizboh doeksaet youh vuenheij, gij saedcej bingzciengz menhmenh miz di mbouj bingzciengz lo. Songde ngoenzngoenz miz gangj miz riu, dujva doxndiep menhmenh youq ndawsim Fangh Yizboh hai okdaeuq lo.

Mbouj rox mbouj nyinh, bi he gvaqbae lo, Fangh Yizboh couh yienghneix haeuj aen "gien" daihngheih bae lo.

Sam

Dangz Siujdingz raen Lij D Ngh ngoenznaengz riunyum da mbouj liz Fangh Yizboh, de ndawsim soemj-satsat.

Ngoenz he, youh lwnz daengz Dangz Siujdingz caeuq Lij D Ngh cigban. Dangz Siujdingz raen mbouj miz vnz daeuq aeu yw, couh ing youq bakdou ranzbanhgoeng, song da dinghdingh yawj Lij D Ngh, ndawda cungj dwg maezlien. Lij D Ngh geizheih muengh coh de. Dangz Siujdingz caiq hix nyaenx mbouj ndaej, buet gvaqbae godawz Lij D Ngh, doq daej doq cup. Lij D Ngh doeksaet yat, baenzlawz cungj bwed mbouj duet.

Dingjlingz Fangh Yizboh byaij gvaqdaeuq, yawjraen gij yiengh neix. De doeksaet dangqmaz, sikhaek cung ok henz dah bae, de daejsubsub, gij rumz boq daengz gwnz naj, gwnz ndang daeuq, de geijlai maqmuengh gij rumz neix ci deuz gij saeh haxbaenh bae. Yawj gij raemxdah coh baihdoung mbouj dingz mbouj duenh lae bae, de rox, gij cingzngheih caeuq Lij D Ngh hix gaen lae bae gizgyae lo.

Gizsaed, bohmehe Fangh Yizboh gig lau de lij haq youq lajmbanj, moix baez de dauqranz, bohmehe cungj nambedbed, naeuz miz vnz yaek

•sawcuenh•



gaisau bouxcoz ndaw singz caeuq de doxraen…… Mwhhaenx ndawsim de cij miz Lij D Ngh, bohmehe gangj maz de cungj mbouj dam gvaq.

Gaxgonq Fangh Yizboh lij miz di naemnaiq, seizneix dauqdaej roengz ndaej gietsim doxbiek lo!

Ngoenz daihngheih, de couh cinggyaj bae ranz, gouz bohmehe ra vnz diuh de bae dieg wng. De gvendou youq, ngoenzhwnz ninz dwk. Bohmehe mbouj rox de vihmaz, yousim dangqmaz, raen dahlwg baenzneix, dapwngq gij cinggouz de lo.

Fangh Yizboh diuh deuz lo, Lij D Ngh lumj hoenz mbin bae nei, simcieg dangqmaz. Doeklaeng de baez raen Dangz Siujdingz cungj hozndat, mbouj gangj saek coenz couh buetdeuz.

Song ndwen gvaqbae, aen bak-sieng ndaw sim Fangh Yizboh ngamq baenz gvaep lo, Lij D Ngh sawqmwh ndwn youq dangqnaej de.

Fangh Yizboh yienznaeuz hawj Lij D Ngh gejnaeuz, hoeng, de mbouj saenq. Fangh Yizboh heuh Lij D Ngh lingh ra vnz, de swheij hix gaenq bae caeuq bouxwnq doxraen lo, Lij D Ngh naeuz cij aeu de guh yah. Songde couh yienghneix dingzdingz duenhduenh youh gvaq le sam bi.

Bohmehe raen Fangh Yizboh youh caeuq Lij D Ngh baedauq lo, couh siengj banhfap gienq de. Meh de naeuz: "Mwngz baez haq roengz lajmbanj, seiqvunz couh lumj doek rag youq gizde lo……" De naeuz: "Seizneix youq lajmbanj, mbouj dwg seiqvunz youq lajmbanj, dou lij coz, gaenxguh baengh bonjsaeh diuh daeuq ndaw singz couh baenz lo!"

Fangh Yizboh cungj mbouj dawz gij vah bohmehe haeujrwz, dauqfanj caeuq Lij D Ngh engq doxgyaez lo. Raen de caen laemxsim aeu haq, dah hung mbouj dingq gangj, bohmehe sim' unq lo, doengzeiq songde dox-

aeu, ndawsim cij muengh songde yied gvaq yied ndei.

Seiq

Baez yaepda, cib lai bi gvaqbae lo, Lij D Ngh gvanbaz caez yungh-rengz guhhong, dauqdaej ndaej diuh hwnj yihyen hung ndaw singz lo. Songde seng miz dahlwg he, lij cawx ranz cawx ci dem.

Doeklaeng, guekgya hawj lai ciengx lwg daihngheih, Fangh Yizboh youh seng ndaej daeglwg songseng, seizneix cingq naenghdwen.

De caeuq Lij D Ngh youq aen "gien" vuenyungz ndawde gvaq ndaej diemzswdswd, bohmehe Fangh Yizboh cungjsuenq ndaej soeng gaemz heiq he lo.

Haemh ndeu, Fangh Yizboh baez singj gvaqdaeuq, couh yaek daengz cibngheih diemj cung lo, Lij D Ngh youh bae gwn laeuq caengz dauqma. De gag hwnqdaeuq ra raemx gwn, swnhbienh dawz soujgih daeuq yawj-yawj. Cingq yawjraen aen saenqsik baengzyoux he haxbaenh fat daeuq.

Baengzyoux fat aen doz daij gienbaengzyoux cienj gvaqdaeuq. Dwg Lij D Ngh fat okdaeuq, ndaw doz Lij D Ngh unqswnh bungj faj naj Dangz Siujdingz caemhcaiq cup najbyak de, doiqnaj lij miz aen dangauh cap rim lab dem. Mbaw doz baihgwnz Lij D Ngh sij dwk——Docih mwngz cibgeij bi doxbuex!

Dai lo! Fangh Yizboh da ndaem lo! Lij D Ngh gingqyenz muenz de caeuq Dangz Siujdingz caez gvaq ngoenzseng! "Cibgeij bi doxbuex" dwg maz eiqsei? Lij D Ngh fat diuz neix youq gienbaengzyoux vanzlij lanz de bae, mbouj hawj de yawj ndaej raen dem!

"Bum" sing he, aen boingq gwn raemx daij ndaw fwngz de saenz doek roengz lajdieg bae, soi q liux lo. Miz

naed gingq iq he biu hwnjdaeuq camx haeuj angdin bae, lwed laelele!

Mehbuz daij ndaw rug bwn-gyaeuj nyungqnyat damq gyaeuj okdaeuq, gvaiq de guh saeh lujlaj.

Fangh Yizboh uk luenh rwz maenj, haeb heuj haeb faenz, song ga saenzdwdwd cungj unq liux. De fwt naengh roengz eij bae, song fwngz goemq naj, daengx ndang lumj miz cien fanh duzmoed haeb nei, youh humz youh get, mbouj rox baenzlawz guh cijndei……

Ndaek neix couhdwg ciengz naeuz gyaez gou? Gou samcib lai bi hix mauhyiemj seng lwg, seizneix lij youqndwen, de dauq bae cup dah wng, vih dah wng gvaq ngoenzseng! Vanzlij gek yah bonjfaenh guh vnz "gien" rog! Mbwn ha mbwn, gij saeh neix cungj guh ndaej ok, byajbag dai de suenq lo! Fangh Yizboh raemxda laelulu, ndawsim mieng naeuz.

Aen ndangdaj Fangh Yizboh mbouj ndei lai, guekgya naeuz ndaej seng lwg daihngheih le, de daengz samcib ngeih bi cij daiqndang ndaej youq. De baenzlawz hix lumz mbouj ndaej mwhde ngamq seng bouxlwg daih'it.

Seizde ciuq guekgya cwngcwz, cijndaj ciengx lwg ndeu. Mehbuz caetib lai bi, dwg vnz lajmbanj, itcig muengh Fangh Yizboh seng ndaej daeglwg he.

Rox Fangh Yizboh dwg miz dahlwg, mehbus mbouj sim' angq saekdi, maz cungj mbouj dam lo. Lij D Ngh rox dwg dahlwg seiz, hix naeuz mbouj youqgaenj, byawz rox sim de baenzlawz siengj? Dahlwg yaek seng seiz, de hix sij mbouj ndaej cinggyaj buenx Fangh Yizboh caj lwg okseng.

Fangh Yizboh hwet get lumj yaek daekgat, hix gag haeb heuj nyaenx dwk, daengx ndang saenzdwdwd, dwgrengz dangqmaz. De boux dog bae banh gij saeh gvendaengz seng lwg.

Doeklaeng, daxmeh caeuq dah-nuengx Fangh Yizboh ngamj ganj-daeuj, bang anbaiz ndei de cij ndaej onjsim yietbaeg. Seiz youqgaenj, vanzlij dwg ranzmeh caen. Fangh Yizboh gag siengj gag doek raemxda. De seizhaenx caen dwg gwn vei ngoemx, maz haemzhoj cungj gag gyan roengz dungx bae.

Doeklaeng, seng lwg daihngheih seizde, aenvih nienzgeij engq hung, seng lwg okdaeuq oklwed lai, lij cad vut mingh bae dem!

Siengj mbouj daengz, cibgeij bi daeuq, de dauq baenz "vnz gien rog" Lij D Ngh lo! Caen hangz vnz! Fangh Yizboh lumj deng fangz gaemh hoz nei, doiqcaw mbouj ndaej.

"A——" De swenj sing hung he, fwt ndwn hwnjdaeuq, cung ok dou bae. Raemxda lumj gij naedcaw nei itloh doek roengzdaeuq. Gvaq caenh he, de daej baeg lo, ndawsim hix menhmenh caem roengzdaeuq lo. De lij miz sam boux lwg, lij miz bohmehe dahnuengx, miz baenzlai vnzcaen, couhsuenq doiqnaj de dwg baenz aen baenz aen "gien" seiqvunz, de hix aeu haeb heuj byaij roengzbae, Lij D Ngh cungj vnz yak neix, mbouj boiq youq aen gien seiqvunz de youq lo……

(2 sat)